

Насиҳат ким учун?



20:30 / 09.11.2017 4663

Набий соллаллоҳу алайҳи васаллам: «Дин насиҳатдир», дедилар.

Саҳобалар Пайғамбаримиз соллаллоҳу алайҳи васалламдан бу умумий гапни эшитиб, унинг тафсилотини билмоқчи бўлдилар ва у зотдан:

«Ким учун?» деб сўрадилар.

Яъни «Насиҳат қилсак, ким учун қиламиз?» дедилар. Шунда Расули акрам соллаллоҳу алайҳи васаллам диннинг мадори бўлмиш насиҳат беш нарсада эканлигини баён қилиб бердилар:

Аллоҳ учун насиҳат

1. «Аллоҳ учун» насиҳат қилиш, яъни Аллоҳга иймон келтириш, Унга шукр қилиш, самимий, холис бўлишдир.

Уламоларимиз бу борада бир оз батафсилроқ гапларни ҳам айтганлар. Уларнинг айтишларича, Аллоҳ таоло учун насиҳат қилиш жумладан, қуйидагилардан иборат:

1. Аллоҳ таолога иймон келтириш.
2. Аллоҳ таолога шерикни манфий қилиш.
3. Аллоҳ таолонинг сифатларида хатони тарк қилиш.
4. Аллоҳ таолони барча камолот сифатлари билан сифатлаш.
5. Аллоҳ таолони барча нуқсонлардан поклаш.
6. Аллоҳ таолога тоатда бардавом бўлиш.
7. Аллоҳ таолога маъсиятни тарк қилиш.
8. Аллоҳ таоло учун муҳаббат қилиш.
9. Аллоҳ таоло учун ёмон кўриш.
10. Аллоҳ таолонинг тоатидагилар билан дўст бўлиш.
11. Аллоҳ таолога осий бўлганларга адоватда бўлиш.
12. Аллоҳ таолонинг неъматларини эътироф қилиш.
13. Аллоҳ таолонинг неъматларига шукр келтириш.
14. Аллоҳ таолога барча ишларда ихлос қилиш.

Аллоҳнинг китоби учун насиҳат

2. «У Зотнинг Китоби учун» насиҳат қилиш, яъни Аллоҳнинг Китоби – Қуръони Каримни ўрганиш, унга амал қилиш ва одамларни ҳам шу ишга ундан, холис бўлиш, насиҳат қилиш.

Уламоларимиз бу борада ҳам бир оз батафсилроқ гапларни айтганлар. Уларнинг айтишларича, Аллоҳ таолонинг Китоби – Қуръони Карим учун насиҳат қилиш жумладан, қўйидагилардан иборат:

1. Қуръони Карим Аллоҳ таолонинг нозил қилган каломи эканига иймон келтириш.
2. Қуръони Карим халойиқнинг каломига ўхшамаслигига иймон келтириш.

3. Қуръони Каримга ўхшаш каломни келтиришга халойикдан ҳеч ким қодир эмаслигига иймон келтириш.
4. Қуръони Каримни улуғлаш.
5. Қуръони Каримнинг ҳаққини жойига қўйиб, уни гўзал равишда тиловат қилиш.
6. Қуръони Карим тиловатини хушуъ билан қилиш.
7. Қуръони Карим тловатида ҳарфларни ўз ўрнидан чиқариш.
8. Қуръони Каримни нотўғри таъвил қилувчилардан ҳимоя қилиш.
9. Қуръони Каримни таъначиларнинг таънасидан ҳимоя қилиш.
10. Қуръони Каримда бор нарсаларни тасдиқлаш.
11. Қуръони Каримнинг ҳукмларини бажариш.
12. Қуръони Каримнинг илмларини ва масалаларини фаҳмлаш.
13. Қуръони Каримнинг ваъзларини эътиборга олиш.
14. Қуръони Каримнинг ажойиботлари ҳақида тафаккур қилиш.
15. Қуръони Каримнинг муҳкам – маъноси бошқасига ўхшамаган очик-оидин оятларига амал қилиш.
16. Қуръони Каримнинг муташобиҳ – маъноси бошқасига ўхшаш, тушуниш учун уриниш керак бўладиган оятларига таслим бўлиш.
17. Қуръони Карим оятларининг оми ва хосини билиш.
18. Қуръони Карим оятларининг носих ва мансухини билиш.
19. Қуръони Каримнинг илмларини тарқатиш.
20. Қуръони Каримга чақириш.

Аллоҳнинг расули учун насиҳат

3. «У Зотнинг Расули учун» насиҳат қилиш, яъни холис, самимий бўлиш.

Уламоларимиз бу борада ҳам бир оз батафсилроқ гапларни айтганлар. Уларнинг айтишларича, Расулуллоҳ соллаллоҳу алайҳи васаллам учун насиҳат қилиш жумладан, қуидагилардан иборат:

1. Расулуллоҳ соллаллоҳу алайҳи васалламнинг пайғамбарликларини тасдиқлаш.
2. Расулуллоҳ соллаллоҳу алайҳи васаллам келтирган барча нарсаларга иймон келтириш.
3. Расулуллоҳ соллаллоҳу алайҳи васалламнинг амрларига ва қайтариқларига итоат қилиш.
4. Расулуллоҳ соллаллоҳу алайҳи васалламга ҳаётларида ҳам, мамотларида ҳам ёрдам бериш.
5. Расулуллоҳ соллаллоҳу алайҳи васалламни дўст тутганларни дўст тутиш.
6. Расулуллоҳ соллаллоҳу алайҳи васалламнинг ҳақларини улуғлаш ва у зотни ҳурматлаш.
7. Расулуллоҳ соллаллоҳу алайҳи васалламнинг шариатларига бўлган туҳматларни қайтариш.
8. Расулуллоҳ соллаллоҳу алайҳи васалламнинг шариатларига оид илмларни ўрганиш.
9. Расулуллоҳ соллаллоҳу алайҳи васалламнинг шариатларига оид маънолар фиқхини ўрганиш.
10. Расулуллоҳ соллаллоҳу алайҳи васалламнинг шариатларини ўрганишда ва ўргатишда лутфли бўлиш.
11. Расулуллоҳ соллаллоҳу алайҳи васалламнинг шариатларини улуғлаш ва шарафлаш.
12. Расулуллоҳ соллаллоҳу алайҳи васалламнинг суннатларини ўқиганда одобли бўлиш.
13. Расулуллоҳ соллаллоҳу алайҳи васалламнинг суннатлари ҳақида илмсиз равишда сўз юритишдан сақланиш.

14. Расууллоҳ соллаллоҳу алайҳи васалламнинг суннатлариға аҳл бўлганларни ҳурматлаш.
15. Расууллоҳ соллаллоҳу алайҳи васалламнинг хулқлари билан хулқланиш.
16. Расууллоҳ соллаллоҳу алайҳи васалламнинг одоблари билан одобланиш.
17. Расууллоҳ соллаллоҳу алайҳи васалламнинг аҳли байтлариға муҳаббат қилиш.
18. Расууллоҳ соллаллоҳу алайҳи васалламнинг саҳобалариға муҳаббат қилиш.
19. Расууллоҳ соллаллоҳу алайҳи васалламнинг суннатлариға бидъат аралаштирганлардан четланиш ва бошқалар.

Мусулмонларнинг имомлари учун насиҳат

4. «Мусулмонларнинг имомлари учун».

Мусулмонларнинг имомлари учун насиҳат қилиш уларга итоат қилиш ва одамларни ҳам шунга чақириш билан бўлади.

Уламоларимиз бу борада ҳам бир оз батафсилроқ гапларни айтганлар. Уларнинг айтишларича, Мусулмонларнинг имомлари учун насиҳат қилиш жумладан, қуидагилардан иборат:

1. Мусулмонларнинг имомлариға ҳақ ишларда ёрдам бериш.
2. Мусулмонларнинг имомлариға ҳақ ишларда итоат қилиш.
3. Мусулмонларнинг имомларини ҳақ ишга чақириш.
4. Мусулмонларнинг имомларини юмшоқлик ва лутф билан огоҳлантириш ва эслатиш.
5. Мусулмонларнинг имомлариға улар билмай қолган ва уларга етмаган нарсаларни билдириб қўйиш.

6. Мусулмонларнинг имомларига қарши чиқиши тарк қилиш.
7. Мусулмонларнинг имомларига тоат қилишга одамларни ўргатиш.
8. Мусулмонларнинг имомлари ортидан намоз ўқиши.
9. Мусулмонларнинг имомлари ҳақларига дуода бўлиш.
10. Мусулмонларнинг имомларини беҳуда мадҳ қилмаслик ва ҳоказо.

Мусулмонлар оммаси учун насиҳат

5. «Мусулмонлар оммаси учун».

Бу барча мусулмонларга икки дунё саодати, яъни Ислом йўлини кўрсатиб, холис насиҳат қилиш билан бўлади.

Уламоларимиз бу борада бир оз батафсилроқ гапларни ҳам айтганлар. Уларнинг айтишларича, мусулмонлар оммаси учун насиҳат қилиш жумладан, қуидагилардан иборат:

1. Ўзига раво кўрган нарсани мусулмонлар оммасига ҳам раво кўриш.
2. Ўзига раво кўрмаган нарсани мусулмонлар оммасига ҳам раво кўрмаслик
3. Мусулмонлар оммаси учун шафқатли бўлиш.
4. Мусулмонлар оммасининг кичиклари учун раҳмли бўлиш.
5. Мусулмонлар оммасининг катталари учун ҳурматли бўлиш.
6. Мусулмонлар оммасининг маҳзунлиги учун маҳзун бўлиш.
7. Мусулмонлар оммасининг хурсандлиги учун хурсанд бўлиш.
8. Мусулмонлар оммаси учун салоҳият ва офият бўлишини исташ.
9. Мусулмонлар оммаси учун неъматлар бардавом бўлишини орзу қилиш.
10. Мусулмонлар оммаси учун доимо яхшиликда ёрдамчи бўлиш.

11. Мусулмонлар оммасидан барча озорлар ва кўнгилсизликларни даф қилиш.

Ушбу вазифаларни бажарган одам диннинг энг муҳим ишини амалга оширган бўлади. Аммо бу осон иш эмас. Шунинг учун ҳам у диннинг мадори ҳисобланади. Чунки одамлар насиҳатни ёқтирмайдилар. Айниқса ушбу ҳадиси шарифда зикр этилган нарсалар учун қилинган насиҳат кўпчиликка хуш келмайди.

Бу ҳадиси шариф комил иймон сифатлари бобида келтирилган. Бу бежиз эмас, албаттa. Кишида комил иймон бўлгандагина, у шундай насиҳатлар бериш қобилиятига эга бўлади. Комил иймон соҳиби томонидан берилган насиҳатлар эса самара бериши шубҳасизdir. Аллоҳ учун, Аллоҳнинг Китоби ва Расули учун, мусулмонларнинг имомлари, оммаси учун насиҳат қилишни дин деб тушунган жамиятгина олдинга кетади, кўзлаган мақсадига эришади.

Агар биз ушбу ҳадиси шарифдан фойда олмоқчи бўлсак, ана ўша тушунчани қайта тирилтиришимиз, Аллоҳ учун, У Зотнинг Китоби учун, У Зотнинг Расули учун, мусулмонларнинг имомлари учун, оммаси учун насиҳат қилишга ўтишимиз лозим бўлади.

Бутун дунё ушбу ҳадиснинг ҳикматига ниҳоятда муҳтождир. Энг аввало, мусулмон олами муҳтож. «Мусулмон олами» деб ном олган олам Исломдан узоқлашгани учун, динни насиҳат деб билмагани учун турли муаммо ва кулфатларга кўмилиб ётибди.

Шайх Муҳаммад Содиқ Муҳаммад Юсуф

(Дин насиҳатдир китобидан)